

La giuventetgna svizra ha già cumprà il Rütli

Regal da la Societad svizra d'utilitad publica al Cussegl federal

DA JOHANN ULRICH SCHLEGEL

Avant 150 onns, ils 2 da fanadur 1860, ha la Societad svizra d'utilitad publica (SSUP) regalà al Cussegl federal il Rütli sco uscheditg «dretg inalienabel». Tar questa acziun ha la giuventetgna da la Svizra giugà ina rolla impurtanta. Enfin oz è quest cle-ragl al Lai d'Ursera, enzuglià d'idilla, mits e romantica, restà in simbol istoric pussant per l'entir pajais. La SSUP è veglia. Ella festivescha quest onn ses 200avel anniversari. En noss context interessescha l'istorgia rapportada dal cronist Fritz Aebli davart il via-di en bartga dals delegads l'atun 1858 sin il Lai d'Ursera. «Ils signurs da la Societad svizra d'utilitad publica èn en viva discussiun, cura che la bartga s'avischina al prà dal Rütli. 'Tge mai vul ins construir qua?', vul savair il decan Friedrich Haefelin da Wädenswil. Ils passagiers contemplan attentamain ils mirs da fundament già auts sin il prà dal Rütli. 'Tge vulais?', di il chapitani. 'Il Rütli' è proprietad privata da Michael Truttmann da Seelisberg. El vul construir in hotel sin il prà. Già oz dastgàin nus debartgar qua e passar sin il prà mo cun consentiment dal proprietari.»

La protesta è perfetga. Ils signurs vesan en privel la tgina da la Svizra, il simbol da la libertad dal pievel. Arrivads a Brunnen è la chaussa clera: il president da la SSUP declera a la cumpagnia ch'ins vegnia immediat ad intervegnir.

Il prà dal Rütli e sia simbolica

L'istorgia è vegliurda e sa transfurma en il decurs dals tschientaners ad ina legenda. Ma questa legenda ha dapli impurtanza realistica che millis fatgs apparentamain fitg bain documentads sin ils mantuns da rument da l'istorgia mundiala. Il 1291 è l'origin da la Svizra. Trais eroxs, in represchentant dad Uri, in da Sviz ed in da Sutsilvania, engiran solennamain da sustegnair in l'auter cunter chastellans esters. Ils Trais Confederads prestan l'engirament il pli sontg, da sfratgar las chadainas che tegnan en sclavitid las communitads da lur valladas, da stgatschar ils chastellans brutals dals chastels-fortezza e da restituir la libertad dal pievel e dal pajais.

E questa empermischun, quest engirament ha già lieu tenor la ditga sin il Rütli. L'eventiment è vegnì tradì a bucca e documentà pli tard en scrit. Co che la chaussa è sa splegada en detagl na savain nus betg. Nus savain però co ch'ils carstgauns en Svizra, gea en vastas parts dal mund, s'orienteschan e sa tegnan dapi tschientaners enfin oz vi da questa episodica istorica: la realisaziun da la libertad e la veglia da cumbatter per quella.

En Svizra è quest canon, questa istorgia da liberaziun per uschè dir impegnativa, daventada in ulteriur element central da l'identitad dal pajais.

Il pli grond impuls da mitologisaziun, gea ritualisaziun, è però vegnì pir en il 19avel tschientaner, e quai nà da la Germania. Friedrich Schiller creecha il drama famus da «Gugliem Tell» e suenter la premiera il 1804 cumenza ina vaira campagna triumfala dal drama, betg mo en Svizra, mabain en tut il mund.

Danunder vegn questa simbolica centrala da la Svizra, questa creadra d'identitad ordvart ferma? La Svizra n'ha nagina omogenitad, per exempel geografica u linguistica, d'in pievel cun tratgs specifics nativals. Ella n'ha nagin monarc. Ed ella n'ha gnanc in center. Impurtants experts da dretg public han perquai già daditg determinà en il dretg public svizzer la noziun da la naziun fundada sin la voluntad.

Damai essan nus in pievel, in pajais



La prada dal Rütli è daventada il simbol per la naschientscha da la Confederaziun svizra.

KEYSTONE

Il rampign cun la giuventetgna da la Svizra

L'iniziativa è vegnida da Turitg. Là ha la SSUP fin oz sia sedia. Friedrich Haefelin ha proponì da cumprà il Rütli cun agid d'ina collecta naziunala. Ins è alura sa mess en contractivas cun il proprietari actual Michael Truttmann. Quel ha consentì da vender il Rütli per il pretsch da 55 000 francs.

Il prà cumpiglia ina surfatscha da radund 50 000 m². La construcziun planisada e già cumenzada da l'hotel è vegnida annullada. Sco da vegl ennà han ins desistì da tutta monumentalitad. I dat ina pitschna ustaria, in prà per far picnic, in bigl cun aua da las funtaunas dal prà ed in pitschen museum. In lieu da sbartgar permetta in access cumadaivel sur il lai; percurter è la via champestra lunga e bler pli stentusa.

Lain returnar al temp da l'acziun da la SSUP il 1858. Co dueva la collecta per cumprà il Rütli vegnir organisada?

Ils 3 da mars 1859 han ins fatg in appel sin plaun federal ed è sa drizzà directamain als uffants. L'emoziunalitad e sentimentalitad dal patriotissem èn sa laschadas colliar raffinadamain cun l'idea commovent ch'ils uffants s'engaschan per il salvament dal Rütli. Il rampign ha funcziunà. Era sche las contribuziuns dals uffants da scola han importà mo ina pitschna part da las ulteriuras donaziuns per part fitg generusas, schizunt da l'exteriur, ha il gest simpatic tuttina sveglià ina motivaziun ch'è sa fatga valair en general. Ins ha rimnà en tut la loscha summa da 95 199.31 francs. Tge che questa summa muntava da quel temp pudain nus ans imaginar, sche nus empruvain d'eruir tge valur ch'il franc aveva: la capacitad da cumpra dals 95 000 francs rimnads quella giada correspunda ad ina valur odierna da var quatter milliuns francs.

La SSUP ha engrazià a la giuventetgna svizra cun in ulteriur grond gest, numnadamain cun regalar a mintg'uffant sco regurdanza in maletg dal Rütli. Ella ha reparti passa in quart milliun maletgs. Il 1907 ha il president federal Eduard Müller ludà a chascun d'ina festa commemorativa da 600

onnas la participaziun da la giuventetgna svizra sco «singulara en sia moda, gronda e sublima en sia simplicitad uffantila». L'engaschament da la SSUP ha el commentà sco suonda: «La tgina da la libertad na dueva betg vegnir periclitada; ils uffants dal pajais èn sa radunads enturn ella e l'han protegida sco in stgazi.» L'engaschament dals uffants dat al Rütli salvà ina valur supplementara.

En in document da fundaziun dals 2 da fanadur 1860 ha la societad surdà il Rütli al cussegl federal sco «proprietad naziunala inalienabla». Il cussegl federal ha confidà a la societad l'administraziun dal lieu. Ina cumissiun dal Rütli, integrada en la societad, ademplescha questa incumbensa.

Danovamain ina renaschientscha dal Rütli?

Igl è interessant ch'i sa derasa puspè, suenter onns da contemplaziun naziunala plitost quieta, nov malruaus sin il Rütli. Atgnamain n'è quai betg sorprendent. Il pajais e la populaziun svizra ristga danovamain – e quai a moda fitg sumeglianta sco vers la mesadad dal 19avel tschientaner – da perder in aut grad d'identitad genuina svizra. Nus savain adina pli pauc en tge direcziun che noss pajais sa mova, tge che caracterisescha la Svizra e tgi che nus sezessan. Tut sa mida a moda rasanta. Las ragischs balluccan. Bliers umans turniclan sco fleglia in il vent, senza finamira, per casualitad e senza cuntinuitad. Questa situaziun creecha malsegirezza. La cuntrareacziun è da puspè cuntanscher segirezza e chattar sustegn. E gist en quest mument tscher-tga l'uman ina resposta sin la dumonda, tgi e tge sun jau insumma. Danunder vegn jau e co guarda quai ora là? La soluziun è alura istorgia raquintada, la descripziun da la derivanza. L'anra vegn bittada.

E perquai avain nus davaira il fenomen sorprendent ch'i dat dapi intgins onns puspè festas naziunalas sin il Rütli – bain in pau artificialas, perquai ch'ellas vegnan adina pli curtas e bunamain heclicas. La heclica ed il malruaus s'augmentan en quest lieu mitic

da tala maniera ch'il president federal Samuel Schmid sco politicher da la dretga vegn il 2005 insultà e tschivlà ora. La confusiun vegn evidenta, sch'ins patratga ch'ils disturbaders n'eran forsà betg extremists da la sanestra, mabain per la gronda part members d'ina gruppaziun da l'ala dretga.

Sco già avant 150 onns sa radunan però er ils sanesters sin il Rütli per chattar danovamain identitad, ragischs e simbolica. Ma l'atmosfera è daventada pli agitada, pli perturgada e cumplitgada. I manca la concilianza, quai che lia. Il 1. d'avust 2007 ha la cussegliera federala Micheline Calmy-Rey fatg in pled sin il Rütli. Era sia festa è vegnida disturbada. Ina pitschna chargia explosiva è detunada. Intgins tschofs pastg èn vegnids donnegiads, uschiglio nagut auter. Tant en il cas da Schmid sco da Calmy-Rey stattan las reacziuns teatralas, gea bunamain istericas da las medias en nagina relaziun cun ils eveniments effectivs.

Questa teatralica correspunda però exactamain al malruaus che resulta da la perdita da maletgs e ragischs che creechan identitad. Ed i na dat nagins indizis ch'inditgassan in'unium simbolica da la sanestra e la dretga, sco quai ch'igl è stà pussaivel tranter liberals e conservativs il 1860. Il numnader il pli pitschen pussaivel, per la sanestra e la dretga, numnadamain il pli custaivel bain da la libertad, simbolisà e per uschè dir concretisà en il Rütli, na cuntanschan da preschent ni il champ politic da la dretga ni quel da la sanestra. Omadus tendeschan vers in dirigissem statal creschent. Ina nova dictatura dal conformissem creecha in scumond da patratgar e tabus d'imaginaziun. E questa dictatura d'opiniun daventa la funtauna d'individis politicamain betg pli confurms, da quels da la dretga e da la sanestra, che na vulan betg esser d'accord cun l'apparenta politich correctness dals etablids. En num da la libertad, la quala vegn tenor els zappitschada gist sin il Rütli, protestan els. Igl è in protest sco il 1858. I n'è betg da survesair che quest protest daventa oz pli desperà e cun quai pli aggressiv. L'emprim cun plets, pli tard cun ovras.